

**Pembangking bimbang dengan sokongan rakyat – Najib  
Utusan Online  
29 Januari, 2013**

KUALA LUMPUR 28 Jan. - Tindakan pembangking memperlekeh lawatan kemanusiaan bersejarah Perdana Menteri ke bumi Palestin disebabkan mereka bimbang terhadap sokongan menyeluruh rakyat negara ini ke atas usaha murni tersebut.

Datuk Seri Najib Tun Razak berkata, sokongan menyeluruh itu menyebabkan pemimpin pembangking tidak senang dan cara paling mudah memperlihatkan sikap itu adalah dengan memperlekeh lawatan beliau yang dibuat atas dasar kemanusiaan.

Ini disebabkan mereka tak berbuat demikian, tapi saya sebagai ketua kerajaan telah sampai ke bumi Gaza. Ini merupakan langkah yang mendapat sokongan menyeluruh rakyat dan sudah tentu menimbulkan rasa tidak senang di hati kalangan pemimpin pembangking.

Sepatutnya (pembangking melihat) yang penting sekali matlamat itu tercapai. Maknanya matlamat kita untuk membantu rakyat Palestin dan memperjuangkan isu Palestin tercapai," katanya dalam sidang akhbar selepas merasmikan Forum Generasi Muda 2013 di sini hari ini.

Sempena majlis itu, beliau turut mengumumkan 10 projek baharu untuk golongan muda yang akan diberi dana khusus antaranya pertanian untuk generasi muda, bengkel bijak wang, mentor wilayah, pencegahan jenayah dan program pencarian kerja.

Sebelum ini, rata-rata pemimpin pembangking termasuk Datuk Seri Anwar Ibrahim kurang senang dengan lawatan bersejarah itu apabila bertindak memperlekeh usaha Najib sedangkan lawatan tersebut disambut meriah rakyat Palestin.

Malah Ketua Dewan Pemuda Pas Pusat, Nasrudin Hassan secara biadab menyifatkan lawatan tersebut sebagai hipokrit paling durjana sehingga dikecam pengikut Facebooknya sendiri sebagai seorang yang iri hati dengan usaha murni Najib.

Mengulas lanjut, Najib berkata, apa yang penting lawatan itu memberi mesej jelas kerajaan Malaysia tidak sesekali membiarkan rakyat Palestin keseorangan atau membenarkan isu kesengsaraan dan penderitaan mereka terpinggir.

Hakcipta Terpelihara © UTUSAN MELAYU (M) BERHAD

Source: [http://www.utusan.com.my/utusan/Pilihan\\_Raya/20130129/px\\_01/Pembangking-bimbang-dengan-sokongan-rakyat---Najib](http://www.utusan.com.my/utusan/Pilihan_Raya/20130129/px_01/Pembangking-bimbang-dengan-sokongan-rakyat---Najib)